



Na osnovu Člana 33. Statuta Košarkaškog saveza BiH i Člana 4.1.4. Pravilnika Sudijske komisije Košarkaškog Saveza BiH, Upravni odbor KS BiH na svojoj sjednici održanoj u Sarajevu ' ' od, donosi

DISCIPLINSKI PRAVILNIK SUDIJSKE KOMISIJE KOŠARKAŠKOG SAVEZA BOSNE I HERCEGOVINE

1. OPŠTE ODREDBE

- 1.1. Ovim Pravilnikom utvrđuju se prekršaji, odgovornosti, kazne i zaštitne mjere, te postupak prema članovima SK Košarkaškog saveza Republike Srpske, članovima SK Udruženih Košarkaških saveza iz Federacije Bosne i Hercegovine i SK KSBiH, koji se ogriješe o Statut i druga akta Košarkaškog saveza Bosne i Hercegovine ili na drugi način krše rad, red i disciplinu ili štete ugledu košarkaškog sporta u cjelini.
- 1.2. Ovaj Pravilnik obavezuje i odnosi se na sve aktivne sudije, pomoćne sudije i komesare.
- 1.3. Ovaj Pravilnik utvrđuje pravila kojima se sankcionira nedostojno i nesportsko ponašanje svih članova iz člana 2. kojima se narušava ugled SKKSBiH i košarkaškog sporta u cjelini
Disciplinski postupak mora biti pravovremeno pokrenut i dovršen te djelotvoran u slučaju poduzimanja disciplinskih mjera prema prekršiocu.
Izrečena mjera mora vaspitno djelovati na prekršioca kao i zadovoljiti opštu svrhu izricanja disciplinskih mjera.
- 1.4. Članu SKKSBiH ne može biti izrečena kazna za prekršaj koji prije nego što je učinjen nije ovim Pravilnikom ili drugim opštim aktom i odlukom određen kao prekršaj i za koji na isti način nije bila propisana kazna.
- 1.5. Članovi SKKSBiH (sudije, pomoćne sudije i komesari) čine prekršaj ako je do njegovog izvršenja došlo radnjom ili propuštanjem radnje od strane člana SKKSBiH koji je bio ovlašten da obavi određen dio posla za košarkašku organizaciju.
- 1.6. Niko ne može biti smatran počiniteljem prekršaja dok se to ne utvrdi pravosnažnom odlukom nadležnog organa.
- 1.7. Ovaj Pravilnik primjenjuje se na sve prekršaje bez obzira da li su se desili u inostranstvu ili BiH.

2. DISCIPLINSKI PREKRŠAJ

- 2.1. Prekršajem u smislu ovog Pravilnika smatraju se protivupravne radnje usmjerene protiv opštih interesa, ugleda i kvalitete košarkaškog sporta čija su obilježja utvrđena ovim Pravilnikom.
- 2.2. Počinitelj prekršaja je odgovoran kada prekršaj učini smišljeno ili iz nehata. Nije prekršaj u smislu ovog Pravilnika ako je učinjen u nužnoj odbrani, krajnjoj nuždi, stvarnoj ili pravnoj zabludi.
- 2.3. Prekršaj je izvršen u vrijeme kada je počinitelj radio ili bio dužan da radi, bez obzira kada je posljedica nastupila.
- 2.4. Za pokušaj prekršaja kažnjava se osoba, kada je utvrđeno da je prekršaj namjeravala učiniti, ali je od drugih osoba spriječena u namjeri.
- 2.5. Ko drugog podstiče ili mu pomaže u izvršavanju prekršaja kazniće se kao da ga je sam izvršio. Ako je pokušao izvršenje prekršaja, podstrekač i pomagač kaznit će se kao za pokušaj. Podstrekač i pomagač mogu se osloboditi od kazne ako su dobrovoljno odustali ili spriječili izvršenje prekršaja.

3. VRSTE KAZNE

- 3.1. Izvršiocu prekršaja mogu se izreći sljedeće kazne:
 - Ukor,
 - Zabrana vršenja dužnosti na određenom broju utakmica,
 - Vremenska zabrana obavljanja dužnosti
 - Doživotno isključenje.



- 3.2. Kazna ukorom izriče se u naročito lakim slučajevima, kada je prekršaj učinjen pod izuzetno lakim okolnostima, a organ koji vodi postupak ocjeni da će ova kazna postići opštu namjeru kažnjavanja.
- 3.3. Kazna zabrane obavljanja dužnosti podrazumijeva zabranu obavljanja dužnosti na određenom broju utakmica, određenog stepena takmičenja (prvenstvene, prijateljske, KUP utakmice i turniri). Kazna zabrane obavljanja dužnosti izriče se u trajanju od najmanje dvije, a najviše osam utakmica.
- 3.4. Kazna vremenske zabrane obavljanja dužnosti, podrazumijeva zabranu obavljanja dužnosti na određeno vremensko razdoblje. Kazna vremenske zabrane obavljanja dužnosti podrazumijeva zabranu obavljanja dužnosti svih vrsta utakmica i turnira (prijateljske, prvenstvene, KUP utakmice i turniri), svih nivoa takmičenja od najvišeg do najnižeg stepena, odnosno obavljanja pojedinih ili svih dužnosti u košarkaškoj organizaciji u utvrđenom vremenskom razdoblju. Kazna vremenske zabrane obavljanja dužnosti izriče se na pune mjesece ili godine.
Kazna vremenske zabrane obavljanja dužnosti izriče se u trajanju od najmanje dva mjeseca, a najviše dvije godine.
- 3.5. Kazna doživotnog isključenja izriče se za prekršaj učinjen pod izuzetno teškim okolnostima, kada je počinioc pri njegovom izvršenju ispoljio naročitu odlučnost, upornost ili bezobzornost ili je izazvao naročito teške posljedice.

4. IZRICANJE KAZNE

- 4.1. Prilikom izricanja kazne uzimaju se u obzir sve okolnosti koje utječu da kazna bude veća ili manja, a osobito: težina učinjenog prekršaja i njegove posljedice, stepen odgovornosti počinioca, pobude iz kojih je prekršaj učinjen, okolnosti pod kojima je prekršaj izvršen, moralne osobine počinioca i držanje nakon učinjenog prekršaja.
U slučaju kada postoje takve olakšavajuće okolnosti koje ukazuju da se i blažom kaznom može postići svrha kažnjavanja, organ koji vodi postupak može odrediti i nižu kaznu od kazne predviđene ovim Pravilnikom. Ublažavanje kazne vrši se tako, što se kazna obavljanja dužnosti na određenom broju utakmica, kazna vremenske zabrane obavljanja dužnosti ili novčana kazna, umanjuje najviše do polovice računajući od minimuma kazne predviđene za taj prekršaj.
- 4.2. Prilikom izricanja vremenske kazne obavljanja dužnosti i novčane kazne, nadležni organ može odložiti izvršenje izrečene kazne za vrijeme koje ne može biti kraće od 6 mjeseci niti duže od jedne godine (uslovna kazna), s tim da se izrečena kazna neće izvršiti ako počinioc u tom roku ne učini novi prekršaj.
Odlaganje izvršenja kazne odrediti će se ako prema okolnostima pod kojima je učinjen prekršaj i prema ponašanju počinioca poslije njegovog izvršenja kao i s obzirom na njegov raniji rad i ponašanje, nadležni organ ocijeni da počinitelj i bez izvršenja izrečene kazne ubuduće neće vršiti prekršaje kao i da će samo izricanje kazne ostvariti svrhu kažnjavanja.
- 4.3. Olakšavajuće okolnosti postoje ukoliko je počinioc prekršaja ranije bio primjernog sportskog ponašanja ili na to ukazuje njegov rad u košarkaškoj organizaciji, ugled i druge zasluge za razvoj i unaprijeđenje košarkaškog sporta. Priznanje o učinjenom prekršaju uvijek je olakšavajuća okolnost.
- 4.4. Otežavajuće okolnosti postoje kada je prekršaj učinjen ponovo, kada postoje osobito teške posljedice ili druge okolnosti zbog kojih je prekršaj dobio teži oblik.
Počinioc je ponovio prekršaj ako je ranije bio kažnjavao za učinjeni prekršaj, a nije proteklo više od godine dana računajući od dana pravosnažnosti ranije izrečene kazne.
- 4.5. Prilikom odmjeravanja kazne posebno će se voditi računa i o stepenu odgovornosti počinioca, ostalim okolnostima pod kojima je prekršaj izvršen, kao i o posljedicama i o opasnostima koje za košarkaški sport učinjen prekršaj u sebi nosi.
U slučaju odmjeravanja kazne za više prekršaja o kojima se istovremeno raspravlja, prvo će se utvrditi kazna za svaki prekršaj pojedinačno, a potom se donosi odluka o jedinstvenoj kazni uz postupanje po slijedećim pravilima:
- 4.5. Izrečena kazna doživotnog isključenja kumulira sve ostale kazne,
- 4.6. Više izrečenih kazni vremenske zabrane obavljanja dužnosti spajaju se u jednu koja mora biti manja od zbira izrečenih vremenskih kazni.
- 4.7. Ako je za jedan prekršaj izrečena kazna vremenske zabrane obavljanja dužnosti, a za drugi zabrana obavljanja dužnosti za određen broj utakmica, onda vremenska kazna obavljanja dužnosti kumulira kaznu zabrane obavljanja dužnosti određenog broja utakmica.



- 4.8. Ako je za jedan prekršaj izrečena novčana kazna, a za drugi prekršaj bilo koja druga kazna izreći će se obje kazne.
- 4.9. Ako je izrečeno dvije ili više novčanih kazni, jedinstvena kazna ne može biti veća od zbira izrečenih novčanih kazni.
- 4.6. U slučaju kada se izriče kazna počiniocu koji već izdržava kaznu, nadležni organ će kaznu koja se izdržava uzeti kao utvrđenu, odrediti će kaznu za novi prekršaj i potom će izreći jedinstvenu kaznu postupajući u smislu ovog člana, s tim što će se izdržani dio kazne uračunati u vrijeme, odnosno u jedinstvenu kaznu.

5. ZASTARA

- 5.1. Pokretanje disciplinskog postupka zastarjeva u roku od 6 mjeseci od dana izvršenja prekršaja, odnosno u roku od 3 mjeseca od dana saznanja za izvršeni prekršaj. Disciplinski postupak se smatra obustavljenim i ne može se dalje voditi ukoliko u roku od 6 mjeseci od dana pokretanja postupka nije donijeta Odluka u prvom stepenu.

6. UKIDANJE I BRISANJE KAZNE

- 6.1. Izrečena kazna ne može se izvršiti ako je proteklo:
 - 6.1.1 6 (šest) mjeseci od izricanja kazne zabrane obavljanja dužnosti na određenom broju utakmica,
 - 6.1.2 2 (dvije) godine od izricanja kazne vremenske zabrane obavljanja dužnosti u trajanju od 1 (jedne) godine,
 - 6.1.3 3 (tri) godine od izricanja vremenske kazne zabrane obavljanja dužnosti u trajanju od preko 1 (jedne) godine,
 - 6.1.4 1 (jedna) godina od izricanja novčane kazne.
Zastarjevanje izvršenja kazne počinje od dana kada je odluka postala pravosnažna, a kod uslovne kazne od dana kada je pravosnažno određeno njeno izvršenje.
- 6.1.1. Poslije proteka jedne godine od dana izdržane, oprostene i zastarjele kazne, kažnjeni se briše iz evidencije kažnjenih.
Uslovna kazna briše se iz evidencije kažnjenih protekom tri mjeseca, računajući od dana proteka vremena za koje je izvršenje kazne bilo odloženo.

7. POPIS IZREČENIH MJERA

- 7.1. Punovažne odluke o kazni upisuju se u evidenciju koju vodi Disciplinski sud SKKS BiH, kao organ koji izriče kazne u prvom stepenu.

8. DISCIPLINSKI POSTUPAK I NADLEŽNOST ZA ODLUČIVANJE

- 8.1. Disciplinski postupak se pokreće na osnovu prijave ili po službenoj dužnosti. Prijavu može podnijeti svaka zainteresovana osoba, organ ili SKKS BiH.
- 8.2. Odlučivati u smislu ovog Pravilnika može Disciplinski sud u prvom stepenu i SKKS BiH u drugom stepenu, te Upravni odbor KS BiH.
- 8.3. Disciplinski sud vodi postupak i izriče kazne za prekršaje učinjene od strane članova (sudija, komesara, pomoćnih sudija i dr.).
- 8.4. Disciplinski sud vodi postupak i odlučuje o prekršajima učinjenim na prvenstvenim takmičenjima, prijateljskim utakmicama i turnirima i na međunarodnim utakmicama i turnirima u organizaciji KS BiH.
- 8.5. Disciplinski sud nadležan je da pokreće i sprovodi postupak te izriče kazne za počinjena djela iz ovog Pravilnika, učinjena od strane članova SKKS BiH, ako protiv njih nije otvoren postupak pred Disciplinskim organima KS BiH ili Takmičarskom komisijom.
U slučaju kada je protiv člana SKKS BiH za isto djelo, pokrenut postupak i pred disciplinskim organima KS BiH ili Takmičarskoj komisiji, dalje vođenje disciplinskog postupka pred disciplinskim organima SKKS BiH se obustavlja.



Ako je od strane Disciplinskog suda SKKS BiH, za isto djelo, donijeta odluka u prvom stepenu o kazni za člana SKKS BiH, prije prijema izvještaja da se protiv istog člana pokreće disciplinski postupak pred disciplinskim organima KS BiH ili Takmičarskom komisijom, za isto djelo, obustavlja se vođenje disciplinskog postupka pred disciplinskim organima KS BiH ili Takmičarskom komisijom.

- 8.6. Disciplinski organ KS BiH dužan je pismeno izvjestiti Disciplinski sud SKKS BiH o pokretanju disciplinskog postupka protiv člana SKKS BiH.
- 8.7. Disciplinski sud SKKS BiH čine predsjednik i tri člana koje bira i razrješava dužnosti SKKS BiH. Disciplinski sud SKKS BiH raspravlja i donosi odluke u vijeću od tri člana, a donosi odluke većinom glasova svih članova vijeća.
Za svaki pojedini slučaj članova vijeća Disciplinskog suda određuje predsjednik Disciplinskog suda.
- 8.8. Disciplinski sud donosi odluke po provedenom postupku i pribavljenim izjavama od sudionika koje moraju biti u pismenom obliku.
- 8.9. U slučaju sumnje o počinjenju prekršaja za koji se može izreći vremenska kazna obnašanja dužnosti ili doživotno isključenje, okrivljenom se može izreći suspenzija.
Suspenziju izriče predsjednik Disciplinskog suda i traje sedam dana.
Suspenziju izrečenu od strane predsjednika Disciplinskog suda može produžiti SKKS BiH do donošenja odluke u prvom stepenu s tim da se može produžiti do pravosnažne odluke. Vrijeme provedeno pod suspenzijom uračunava se u kaznu.
O odluci o suspenziji počinitelj prekršaja obavještava se brzojavom i preporučenim pismom na kućnu adresu.
- 8.10. Disciplinski sud mora izraditi pismeni otpравak odluke o odgovornosti okrivljenog koja odluka naročito sadrži:
 - Naziv i sastav organa koji Odluku donosi, kao i datum donošenja odluke,,
 - Ime, prezime i dužnost osoba, kojima se izriče kazna,
 - Opis prekršaja,
 - Odluka o kazni,
 - Obrazloženje odluke
 - Pouka o pravnom lijeku.
- 8.11. Pismeni otpравak odluke sačinjava se u dovoljnom broju primjeraka za okrivljenog, njegovu Sudijsku komisiju i za podnositelja prijave.
- 8.12. Protiv odluke Disciplinskog suda donijete u prvom stepenu, može se podnijeti žalba u roku od tri dana računajući od dana pismene odluke podnosi se SKKS BiH kao organu koji donosi odluku u drugom stepenu, a čija je odluka konačna.
Žalbu može podnijeti podnositelj prijave, okrivljenik osobno ili putem svog braniča ili opunomoćenika. Podnesena žalba zadržava izvršenje ukinute odluke.
- 8.13. Sudijska komisija KS BiH može žalbu:
 - odbaciti,
 - odbiti, a odluku Disciplinskog suda potvrditi,
 - usvojiti, a predmet vratiti Disciplinskom sudu na ponovno razmatranje i odlučivanje ili
 - preinačiti odluku.Sudijska komisija KS BiH će odbaciti žalbu u slučaju njene nepravodobnosti.
- 8.14. U slučaju da je izrečena kazna doživotnog isključenja ili kazna vremenske zabrane obavljanja dužnosti u trajanju preko godine dana, a takva odluka bude potvrđena u drugom stepenu, protiv istih odluka može se izjaviti žalba Upravnom odboru KS BiH u roku 15 dana po primitku odluke u drugom stepenu.
- 8.15. Ako je žalbu podnio samo okrivljeni osobno ili putem svog branioca ili opunomoćenika, odluka u prvom stepenu ne može se izmjeniti na njegovu štetu.

9. VANREDNI PRAVNI LIJEKOVI

- 9.1. Ponavljanje postupka može se tražiti:
 - Ako postoji osnovana sumnja da je odluka zasnovana na lažnim činjenicama,
 - Ako postoje činjenice i novi dokazi koji ranije nisu bili poznati, a koji bi imali utjecaj prilikom odlučivanja,
 - Ako odluka nije donijeta u skladu i u duhu sa ovim Pravilnikom.
- 9.2. Prijedlog za ponavljanje postupka mogu podnijeti:



- kažnjeni,
- podnositelj prijave.

Prijedlog za ponavljanje postupka kada se radi o novim činjenicama i novim dokazima podnosi se najkasnije u roku 3 (tri) mjeseca od dana saznanja za te činjenice, odnosno dokaze.

Prijedlog za ponavljanje postupka u svakom slučaju mora se podnijeti najkasnije u roku od 6 mjeseci od dana pravosnažnosti odluke.

O prijedlogu za ponavljanje postupka odlučuje organ čija se odluka pobija.

ZAHTJEV ZA ZAŠTITU ZAKONITOSTI

- 9.3. Protiv pravosnažnih odluka donijetih protivno odredbama opštih akata SKKSBiH može se podnijeti zahtjev za zaštitu zakonitosti.

O zahtjevu za zaštitu zakonitosti odlučuje Upravni odbor KSBiH, a podnosi ga predsjednik SK KSBiH.

Zahtjev za zaštitu zakonitosti može se podnijeti najkasnije u roku 3 (tri) mjeseca računajući od dana pravosnažnosti odluke.

Zahtjev za zaštitu zakonitosti može se odbiti ili usvojiti. U slučaju da se usvoji, pravomoćna odluka se ukida, a predmet vraća na ponovno rješavanje i odlučivanje.

VANREDNO UBLAŽAVANJE KAZNE

- 9.4. Na temelju molbe kažnjenog Upravni odbor KSBiH može kažnjenog osloboditi od daljeg izdržavanja kazne ili kaznu ublažiti u slučaju postojanja takvih okolnosti koje opravdavaju donošenje takve odluke.

Prilikom odlučivanja u smislu prethodnog stavka, uvijek će se tražiti mišljenje organa u prvom stepenu.

Molba za vanredno ublažavanje kazne može se podnijeti nakon proteka 6 (šest) mjeseci od pravosnažnosti odluke.

10. POSEBNI DIO

- 10.1. Tko ne dođe u dvoranu 1 (jedan) sat prije početka utakmice, za zakašnjenje veće od 5 (pet) minuta kaznit će se:

- za 6 - 15 minuta, (1) jednom utakmicom zabrane obavljanja dužnosti,
- za 16 - 30 minuta, sa (2) dvije utakmice zabrane obavljanja dužnosti,
- za 31 - 60 minuta, (5) sa pet utakmica zabrane obavljanja dužnosti.

- 10.2. Tko ne izađe na teren za igru 20 minuta prije početka utakmice, za zakašnjenje od 2 - 5 minuta, kazniće se:

- sa(1) jednom utakmicom zabrane obavljanja dužnosti,
- za zakašnjenje veće od 5 minuta, kaznit će se:
- sa 3 (tri) utakmice zabrane obavljanja dužnosti.

- 10.3. Tko neopravdano ne dođe na utakmicu, kazniće se:

- zabranom obavljanja dužnosti do 6 mjeseci, a u ponovljenim ili težim slučajevima do godine dana.
- Istom kaznom kaznit će se član SKKSBiH koji je prisutan na utakmici, a na poziv komesara ili prvog sudije odbije obavljati dužnost na utakmici.

- 10.4. Ko obavlja dužnost na utakmici bez službenog naloga ovjerenog od strane Takmičarske komisije ili nadležnog organa teritorijalnog saveza, kazniće se zabranom obavljanja dužnosti od tri utakmice.

- 10.5. Tko na dan prije početka odigravanja utakmice do završetka utakmice konzumira alkohol, kazniće se :

- vremenskom zabranom obavljanja dužnosti od 6 utakmica.

U ponovljenom slučaju konzumiranja alkohola u istoj sezoni izriče se kazna skidanja s liste sudija do kraja takmičarske sezone.

- 10.6. Ako sudija neopravdano prekine utakmicu, odnosno utječe na njen prekid, kazniće se:

- zabranom sudjenja od 6 (šest) utakmica.

- 10.7. Tko dođe na utakmicu ili nastupi na utakmici bez propisane odjeće i opreme, kazniće se:

- za dolazak na utakmicu bez odijela zabranom obavljanja dužnosti na (2) dvije utakmice,
- za dolazak na utakmicu bez službenog odijela zabranom obavljanja obavljanja dužnosti na (2) dvije utakmice,
- za nastup bez trenerke, torbe, opasača, čarapa, patika, majice iste boje ili bez znaka, zabranom obavljanja dužnosti na (1) jednoj utakmici,



- za nastup u hlačama, majici ili patikama druge boje, zabranom obavljanja dužnosti na 4 (četiri) utakmice.
- 10.8. Tko na službenoj utakmici ne nosi obaveznu reklamu tvrtke s kojom je SKKS BiH zaključio ugovor o sponzorstvu, kazniće se:
- zabranom obavljanja dužnosti od 5 (pet) utakmica i iznos penala koji je SKKS BiH dužan isplatiti tvrtki zbog neizvršavanja ugovora o reklami.
- 10.9. Tko daje nedopuštene izjave za sredstva javnog informisanja, kazniće se:
- zabranom obavljanja dužnosti na tri (3) utakmice, a u ponovljenom slučaju zabranom obavljanja dužnosti na 6 (šest) utakmica.
- 10.10. Tko na utakmici ili drugom javnom mjestu vrijeđa ili kleveće svoje kolege ili druge košarkaške radnike, ili komentariše suđenje svojih kolega sudija, koji sude utakmicu, kazniće se :
- zabranom obavljanja dužnosti na 4 (četiri) utakmice, a u ponovljenom slučaju zabranom vršenja dužnosti u vremenu na 8 utakmica (osam).
- 10.11. Tko pokuša ili izvrši, tjelesni napad na bilo kojeg učesnika utakmice ili gledaoca, kazniće se:
- zabranom obavljanja dužnosti u trajanju od najmanje godinu dana.
- Ako je tjelesni napad ili pokušaj učinjen izvan košarkaškog terena nakon utakmice, a u vezi s utakmicom kazniće se:
- zabranom obavljanja dužnosti u trajanju od 6 mjeseci do godinu dana. U slučaju teških posljedica fizičkog napada može se izreći kazna doživotnog isključenja iz članstva.
- 10.12. Tko se nedostojno ponaša za vrijeme obavljanja svoje dužnosti ili se nedolično ponaša na košarkaškoj utakmici, a nije sudionik utakmice, kazniće se:
- zabranom obavljanja dužnosti od 2 (dva) do 6 (šest) mjeseci, a u težim slučajevima do 1 godine dana.
- 10.12. Tko pri obavljanju dužnosti podnosi netačan izvještaj ili drugi službeni dokument, kazniće se:
- zabranom obavljanja dužnosti od 2 (dva) do 6 (šest) mjeseci, a u težim slučajevima do godinu dana.
- 10.13. Komesar koji ne pošalje izvještaj o suđenju u roku od 48 sati po odigranoj utakmici, kazniće se:
- zabranom obavljanja dužnosti na 1 (jednoj) do 3 (tri) utakmice,
 - za zakašnjenjem u slanju izvještaja od 7 (sedam) dana, skidanjem sa liste do kraja takmičarske sezone. Ako osoba iz stavka 1. ovog člana ne podnese prijavu protiv sudije za kojeg se utvrdi da je prijavu trebao podnijeti, kazniće se istom kaznom kao i sudija za počinjeni prekršaj.
- 10.14. Član SKKS BiH kojem je u toku takmičarske sezone izrečena kazna skidanja sa liste, ne može u istoj takmičarskoj sezoni obavljati dužnost na utakmicama nižeg ranga takmičenja.
- 10.15. Tko je naplatio veće troškove koji mu pripadaju, kazniće se :
- zabranom obavljanja dužnosti od 2 (dva) do 6 (šest) mjeseci.
- Za ponovljene prekršaje iz stavka 1. ovog člana izreći će se kazna od one koja je prethodno izrečena, a u težim slučajevima može se izreći i kazna isključenja iz SKKS BiH. Više naplaćeni iznos vraća se uplatnicom na žiro račun oštećene strane.
- 10.16. Tko obavlja dužnost pod suspenzijom ili kaznom, kazniće se:
- zabranom obavljanja dužnosti u vremenu od 6 (šest) mjeseci do 1 (jedne) godine dana.
- 10.17. Član SKKS BiH bice isključen iz članstva SKKS BiH:
- ako ne prihvaća odredbe normativnih akata i odluka SKKS BiH i KS BiH i njihovih organa,
 - ako pri obavljanju svoje dužnosti prima neprimjerene nagrade ili novčane iznose koji nisu predviđeni propisima,
 - ako učini krivično djelo krađe, pronevjere ili pljačke,
 - ako izrazito i iz koristi pristrasno sudi ili obavlja dužnost, ili na to nagovara drugoga,
 - ako je sklon pretjeranom konzumiranju alkohola ili opojnih sredstava,
 - ako učestalo pravi prekršaje za koje se izriču vremenske kazne od šest i više mjeseci.
- 10.18. Ako se član SKKS BiH, pozvan pred organe SKKS BiH, nepristojno i nesportski ponaša biće kažnjen:
- vremenskom zabranom obavljanja dužnosti u vremenu od 3 (tri) do 6 (šest) mjeseci.



- 10.19. Član SKKSBiH koji izjavom ili na drugi način svjesno dovodi u zabludu organe SKKSBiH, pa se uslijed toga donese Odluka koja se inače ne bi donijela, biće kažnjen:
- vremenskom zabranom obavljanja dužnosti u vremenu od 6 (šest) mjeseci do jedne godine dana.
- 10.20. Član SKKSBiH koji da lažni iskaz u postupku pred organima SKKSBiH, biće kažnjen:
- vremenskom zabranom obavljanja dužnosti u vremenu od 3 (tri) do 6 (šest) mjeseci.
- 10.21. Član SKKSBiH koji, ne pridržavanjem Pravilnika ili na neki drugi način ometa rad SKKSBiH ili Upravnog odbora KSBiH biće kažnjen:
- vremenskom zabranom obavljanja dužnosti u vremenu od 3 (tri) do 6 (šest) mjeseci.
- 10.22. Sve izrečene kazne koje nisu izvršene u toku tekuće takmičarske sezone, prenose se u slijedeću takmičarsku sezonu.

11. ZAVRŠNE ODREDBE

- 11.1. Sudijske komisije Kosarkaškog saveza Republike Srpske i Udruženih Kosarkaških saveza Federacije Bosne i Hercegovine za prekršaje učinjene od strane članstva na pojedinim rangovima takmičenja, prijateljskim utakmicama i turnirima koja su u nadležnosti tih saveza primjenjivaće uvođenju disciplinskog postupka odredbe ovog Pravilnika.
- 11.2. Disciplinski postupak započet prije stupanja na snagu ovog Pravilnika koji nije okončan donošenjem odluke o kazni, nastaviće se prema odredbama ovog Pravilnika.
- 11.3. Tumačenje odredbi ovog Pravilnika daje Upravnog odbora KSBiH.
- 11.4. Za sve disciplinske prekršaje koji nisu predviđeni ovim Pravilnikom, a predviđeni su Propozicijama takmičenja, Disciplinskim pravilnikom KSBiH ili nekim drugim aktom KSBiH, Disciplinski sud SKKSBiH može u postupku izricati kazne predviđene tim aktom. Ako je za isti prekršaj izrekla kaznu Takmičarska komisija ili Disciplinski sud KS BiH, neće se voditi postupak niti izricati kazna pred Disciplinskim sudom SKKSBiH.
- 11.5. Koordinaciju sa Takmičarskom komisijom odgovarajućeg takmičenja i organima KSBiH u smislu člana 11.4. ovog Pravilnika obavlja predsjednik Disciplinskog suda SKKSBiH.
- 11.6. Danom stupanja na snagu ovog Pravilnika prestaju da vrijede Disciplinski pravilnici SKKSBiH iz prethodnog perioda.
- 11.7. Ovaj Disciplinski pravilnik stupa na snagu danom donošenja.

U Sarajevu _____ godine _____

UPRAVNI ODBOR KS BIH